



ATASSUT
Steen Lyngé

UPA15/33-1beh
23.04.2015.

Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-imi ukiakkut ataatsimiinnermi Inatsisartut inatsisaattut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aaja Chemnitz Larsen, Inuit Ataqatigiit)

Inuit Ataqatigiit sinnerlugit Inatsisartuni ilaasortaq Aaja Chemnitz Larsen matumani siunnersuutaa pingaaruteqartoq pillugu ATASSUT-mit qujaffigaarput.

Inuiaqatigiit Kalaallit aammalumi nunarsuarmi inuiassuit tamatta pisuussutitta pingaarnersaat tassaapput meerartavut, taakkulu sutigut tamatigut paarilluagassaraagut inersimasutullu suliassarput akimanerpaaq pingaarnarpaarlut tassaavoq meerartatta inersimasunngorluarnissaannut aqutissiuutissiuussinissaq.

ATASSUT-mit qularutiginnigilluinnarparput Meeqqap pisinnaatitaaffii pillugit FN-ip isumaqatigiissutaata 20. November 1989-mi atuutsinneqalerneraniilli nunarsuarmi meeqqat ataatsimut isigalugu inuunerissaarnerulersinneqarnikuusut.

ATASSUT-mit maluginiarparput nunat amerliartuinnartut Meeqqap pisinnaatitaaffii pillugit isumaqatigiissut inatsisitut atuutsilersimagaat, tamannalu isumarput naapertorlugu isumatusaarneruvoq aammalu minnerunngitsumik sakkortuumik avammut ersersitsineruvoq nunami pineqartumi meeqqat pisinnaatitaaffimmikkut annertuumik illersorneqartut, isumaqarpugullu piffissaq apeqquutaaginnartoq nunatta malinnilluni isumaqatigiissut inatsisitut atuutsitsilernissaanut.

Taamatut oqaaseqareerluta ATASSUT-mit erseqqissaatigissavarput Naalakkersuisut paasilluarsinnaavagut sukumiisumik misissueqqaarumammata, taamaammat siunnersuut isumaqatigigaluarlutigu Naalakkersuisut allannguutissatut siunnersuutaat taperserparput.